

**Date – 12/03/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. UD&PA Minister Pu K.Sapdanga'n karleh Thawhlejni Aizawl Treasury Square leh Bazar Bungkawn inkar kawngpui chu feet 50 vela zauin laih tlang phei a ni ang a ti.
2. Chapchar Kut puala Assam Rifles Quarter Guard-a eitur zawrhna hmuna inpho te chu chhuahtirin vantlang mipui tlawh theih lova humhalh zui a ni.
3. Indian Oil Corporation Limited chuan ramchhunga tuialhthei semkualnaah harsatna a awm lo tih an sawi.
4. Prime Minister Narendra Modia chaun ni hnih chamin naktukah Assam a tlawh dawn.

<><><>

**UD& PA**

Urban Development & Poverty Alleviation Department changtu Minister Pu K.Sapdanga'n karleh Thawhlejni, March ni 17 atangin Treasury Square leh Bazar Bungkawn inkar kawngpui chu feet 50 vela zauin laih tlang phei tur a nih thu a sawi.

Vawiin Assembly Budget Session zawhna leh chhanna hunah he thu hi sawiin, UD&PA Minister chuan Chief Minister kaihhraina hnuaiah AR chhuahtin ram humhalh leh tangkai taka hman dan tur ngaihtuatu Advisory committee din a nih thu a sawi a, chutah chuan party hrang hrang leh NGO aiawh, social actitives aiawh leh kohhran aiawhte pawh an tel a ti a. AR chhuahtin ram kut an thlak tura pawimawh ber leh mipui nghahhlelh ber chu kawngpui tih zauh nia a lan avangin karleh Thawhlejni, March ni 17 zing dar 7:30 atangin Treasury Square leh Bazar bungkawn inkar kawngpui awmsa chu inrual tlang phei patin, feet 50 vela zauin laih tlang phei tur a ni dawn a, chu chuan lirthei tawt lutuk a chhawk zangkhai tura a rin thu a sawi a ni.

Minister chuan AR hmun hluiah hian hmanlai hmun ngaihhlut heritage value nei chi hrang hrang a awm a, Quarter Guard leh Loch house tih loh heritage value tak tak nei te lo chu thiah tura ruahman a ni a ti a. Mandir pawh suan chhua a ni dawn tih sawiin, hemi hmunah hian vantlang mipuite tan public park siam a ni dawn a, Lammual grass pah pawh artificial grass tha ber chi in thlak tum a ni a t. AR

cinema hall hmunah chhawng li vel a sangin car sang tel lenna parking lot siam tum a ni a, chumi chungah chuan mi sang 2 vel lenna hall bakah mi 500 vel lenna hall engemawzat sak tum a ni a, hall pui ber chu Vanapa hall hming put tir tum a nih thu sawiin, Vanapa Hall awmsa chu hmanna tangkai dang zawn a ni dawn tih house a hrilh a, AR hmun hlui chu vantlang hmun pawimawh a nih dawn avangin venhimna tha tak a mamawh dawn avangin tlang bawk pakhat chu Police duty na hmun atan siam a ni dawn a, a hmun zau zawk luahtu tur chu hmun hring nuam tak (green area) siamin, Lammual thlang lamah ngaw nuam tak karah taksa sawizawi theihna kawng siam a nih tur thu House a hrilh a ni.

(Corr; Maremi)

<><><>

### AIZAWL DC

Aizawl DC-in Chapchar Kut puala Assam Rifles Quarter Guard-a eitur zawrhna hmun chhuahsan tura a hriattir angin, helai hmuna inpho te chu chhuahtir nghal an ni a, vantlang mipui tlawh theih lova humhalh zui a ni.

Aizawl Bawrhsap Pu Lalhriatpuia chuan Assam Rifles ram chhuahsan a ram ro hlu zinga ngaih Quarter Guard-a eitur zawrhna hmun atan hman a ni chu an ngaih mawh thu leh an phal loh thu New Delhi Sewa Bhavan atanga an dawn avangin Commerce and Industries Department Director hnenah Chapchar Kut puala food stall awm te chu a rang thei ang ber a chhuahsan tir turin hriattirna lehkha a thawn a, Commerce and Industries Department hotute chuan Quarter Guard atanga insawn chhuak tura hriattirna hi nimin tlai khan an dawng a, nizan khan helai hmuna eitur zuarte chu an insawn chhuak nghal vek tih Akashvani News Aizawl an hrilh a, tun dinhmunah Quarter Guard hi vantlang mipui tlawh theih loh turin an hung nghal vek a ni.

Kan correspondent report ngaithla ang

*Voicemas (Maremi) t: Aizawl hmun laili taka awm, ram ro hlu zinga ngaih, Assam Rifles Quarter Guard hi kum 1890 chhoah khan Lieutenant Colonel GH Loch-a sak a ni a, kum zabi 18-na hunlaia laipui pahnih dah a nih bawk avangin INTACH Mizoram Chapter-in hmun hlui pawimawh a chhinchhiah, Built Heritage of Mizoram zingah a tel a ni. Hetihlai hian, vawiin Assembly Session-a UD&PA Minister Pu K. Sapdanga chuan Assam Rifles hmun hlui chhuahsan cheibawl dan tur a sawinaah, AR hmun hluia hmanlai hmun ngaihhlut heritage value nei chi hrang hrang zingah Quarter Guard leh Loch house te chu thiah an nih ve loh tur thu a sawi a ni.*

Maremi & Hruaia PTC

<><><>

## **PWD MINISTER**

PWD Minister Pu Vanlalhlana'n Sairang - Khamrang kawng siamtu NHIDCL-in an siamthat loh avanga mipui in harsatna nasa tak a tawh avangin nikum khan Mizoram sorkar chuan he kawng siam nan hian cheng vbc 7 a seng tih a sawi.

Vawiin Assembly thutkhawma zawhna leh chhanna hunah he thu hi sawiin, PWD Minister chuan Sairang - Khamrang kawng chu NHIDCL kawng a ni a,kawng an siam that loh avangin nikum khan mipui in harsatna nasa tak an tawh phah a, mipui harsatna sukiang turin Mizoram sorkar a che a. Hemi kawng siam nan hian Aizawl South Road leh Aizawl North Road a mite bakah Mizoram sorkar pawisa cheng vaibelchhe 7 vel hman a nih thu House a hrilh.

<><><>

## **SUPPLY**

Food, Civil Supplies & Consumer Affairs Department changtu Minister Pu B.Lalchhanzova'n LPG Distributor-ten Gas bur buk tlinglo an sem thin chu report mumal tak dawng lo mahse Inspector ten gas trip lo thleng chu an lo endik thin tih a sawi.

Vawiin Assembly session-a zawhna chhangin, FCS&CA Minister chuan LPG Distributor-ten Gas bur buk tlinglo an sem thin chu social media leh thu leng vel atang chuan a hre thin a, mimal atang emawa ziak leh official tak chuan report dawn an la nei lo a ti a. Report mumal tak dawn ni lo mahse Inspector ten gas trip lo thleng chu an lo endik thin a. Distributor-ten an godown-a an unload dawnin an buk vek a, a buk tling lo chu an thawn let leh thin avangin an godown a awm chu buk tling vek tura ngaih a ni a ti bawk.

**(Corr: Maremi)**

<><><>

## **CHAPCHAR KUT**

Mizote Kut pui ber leh ngaihhlut ber Chapchar Kut lawmna pui ber chu naktuk khian Aizawl Lammual ah nghah a ni dawn a,

Tun kar chhung zawng hian Chapchar Kut lawmna pual hian thil hrang hrang tih chhoh a ni a, Handloom & Handicrafts Exhibition chu Assam Rifles ram chhuahsan, Vanapa Hall chhakah nghah a ni a, Vanapa Hall-ah hian Art & Photo Exhibition buatsaih a ni a, Aijal Club City Park-ah Flower Show neih a ni bawk a ni.

Vawiin hian chapchar kut lawmna inbuatsaihna kal zelah I&PR Department te chuan Lianchiarin run ah mipui te tan a thlawna mizo film en theihna hun an buatsaih bawk.

Kan corr report lo ngaithla ang.

VC

*Chapchar Kut Lammual a hman turah hian thupui atan 'zonun ze mawinremna ' hman a ni ang a , Kut Pa chu Chief Minister Pu Lalduhawma a ni dawn a, Kut thlengtu atan Pu Lalsawivunga Minister Art & Culture Dept. ani dawn a ni.*

*Chapchar kut 2026 lawmna ah hian, Hlado chham, Cheraw Kanpui, pawnto, Lengkhawm zai, Parlam, Pipu Zai, Lemchan , thla koh, mizawn inchuh, mal zai, pipu zai, zavai chai-Lera zai, khuallam te leh Mizo hnam thuam leh Mizo infiamna te entir na neih a ni ang a, Hei bakah hian hnam lam chi hrang hrang -singhi chham (sikkim), wangala (meghalaya) , hrangkol te neih a ni ang.UD&PA buatsaih faina lawman sem leh Cm Special Package lawmman semna neih ani bawk ang.*

Naktuka Chapchar kut lawm turin Champhai district khawpui pawh a inbuatsaih fel a. Champhai Zotlang Sports Stadium a inbuatsaihna a that leh that loh Champhai DC in NGO hrang hrang hruaitute leh mawhphur tura ruatte hruaiin vawiin khan an enfiah a ni.

Champhai Sub-hqrs YMA President Pu F.Lalrinmuana chuan NGO leh sorkar te an tanrualna a that thu leh an inbuatsaihna pawh a tluan thu a sawi a ni.

(BYTE Champhai Sub-hqrs YMA)

(Hruaia Aizawl PTC/Hlua Champhai PTC)

<><><>

## **SAIPUM**

Saipum ram chhunga Assam mi lo vat an awm ni a thu darh chungchang bawhzuiin, nimin khan Kolasib Bawrsap Pu Robert C. Lalhmangaiha leh Senior SP Pu Lalrinpuia Varte te chuan Saipum khua tlawhin, he harsatna thleng chungchangah hian Saipum khawtlang hruaitute thil awmdan an sawipui a.

He hunah hian Saipum khawtlang hruaitute chuan hnam dang ten lo vah nana hmun an rawn ruahman hi a hma chuan Mizoram sorkar hnuaiia Police te duty-na thin, Chawilung Camp awmna hmun a nih thu an sawi a. Kawng chhiat avanga he hmuna Police duty te an awm theih tak loh hnuah, venhimna hna a lo chak tawk ta lo chu remchangah lain Assam lam atang hian an rawn zuam ta niin an ngaih thu an sawi bawk.

Kolasib Bawrsap chuan he thil thleng hi Sorkar pawhin a ngaipawimawh hle tih sawiin, buaina leh inepna chhuak lova boruak muanawm tak hnuaiia chinfel a nih theih dan kawng zawn chu thil tul hmasa a nih thu a sawi a. A tul ang zela hma la turin sorkar a inhuam thu khawtlang hruaitute hi a hrilh nghal a ni.

Saipum khawtlang hruaitute chuan he hmun hi an pual ram, Saipum ram ngei a nih thu uar takin an sawi a, Assam lam atanga he hmalakna hi an kalpui tlang zel a nih chuan nakin zelah ramri buaina hlawm lian zawk a chhuah theih dawn thu an thlen a. Sorkar chu a hma thei ang bera hma la turin an ngen a, remna leh muanna nena he harsatna chinfel a nih theih dan tur kawng hrang hrang an sawiho nghal bawk a ni.

(DIPR)

<><><>

**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

**IOCL**

Indian Oil Corporation Limited chuan ramchhunga tuialhthei semkualnaah harsatna a awm lo tih a sawi. Social Media lamah IOCL hian he thu hi tarlangin ramchhung hmun hrang hranga tuialhthei semna hmun te dan pangngaiin tha takin an kal tih sawiin Petrol leh diesel pawh mamawh khawp an neih reng thu an sawi. Hei bakah hian ramchhung hmun hrang hranga tuialhthei an pek kualnaah harsatna awm loin tuang takin an kal tih an sawi a. Mipuite chu thu lengvak mai maiah chiaia lo tura chahin tul lova tul lovah petrol leh diesel inchuha petrol pump-a buai vak lo turin a ngen a. Thudik chauh ring ngam tur leh nitin tihdan phung pangngaiin lirthei tuite thun mai turin an chah a ni.

**(Newsonair)**

<><><>

**PM**

Prime Minister Narendra Modia chaun ni hnih chamin naktukah Assam a tlawh dawn. PM Modia hian a cham chhungin hmasawna hmasawna project chi hrang hrang a tlangzarh dawn a. Hei bakah hian Guwahati atangin PM-Kisan Samman Nidhi scheme dawngtu loneitu vaibelchhe 9 leh nuai 32 chuangte accountah cheng vaibelchhe 18,640 a thun dawn a. Inrinniah Silchar a pang ang a. hetahhian hmasawna hnathawh cheng vaibelchhe nuai 24,205 hu a hawng dawn a. Silchar-Guwahati expressway cheng vaibelchhe 22000-a siam tur lungphum a phum dawn a. He expressway hi hmarchhaka a hmasa ber tur a ni a. Km 166-a thui kawngpui zau leh nuam tak niin Silchar leh Guwahati inkar darkar 8 tlan ngai thin chu darkar 4 leh a chanve ah a thlen theih tawh dawn a ni.

**(Newsonair)**

<><><>